



Fundasaun Mahein (FM), 30 Novembru 2020

Komunikadu Imprensa

## **Pareser ba Komisaun B Parlamentu Nasional RDTL kona-bá Proposta Lei Orsamentu Jeral Estadu 2021 ba Setor Defeza, Seguransa no Negosiu Estranjeiru**

*“Prespetiva Sosiedade Sivil”*

Proposta Lei Orsamentu Jeral Estadu (OJE) 2021 Governu submete ona ba Parlamentu Nasional iha loron 15 Outobru 2020. Nune'e ba tinan 2021 total OJE hamutuk US\$ 1,895,000,000. Iha kuadru Proposta OJE 2021 aloka ba prioridade lima no prioridade ida maka konsolidasaun no fortalesementu defeza, seguransa no negosiu estranjeiru ho nia orsamentu hamutuk US\$ 158,830,873 (8.8%). Relatóriu ida ne'e halo análise ba area espesifiku sira ne'ebé tuir FM presiza diskute kle'an antes implementa no ida ne'ebé implementa ona presiza mellora diak liu-tan. Área espesifiku sira ne'ebé sai atensaun prinsipal husi FM iha relatóriu ida ne'e maka hanesan implementasaun servisu militar obrigatoriu, polisiamentu komunitária no investigasaun kriminal ho kilat.

Primeiru, *Defeza Nasional – Servisu Militar Obrigatoriu*, Iha âmbito Proposta Lei OJE 2021 Ministériu Defeza hetan alokasaun orsamentu hamutuk US\$ 14,050,485 no F-FDTL hamutuk US\$ 25,171,729. Maibe Planu Asaun Anual 2021 Ministériu Defeza no F-FDTL nian la temi klaru kona-bá implementasaun Servisu Militar Obrigatoriu. Maske nune'e, normalmente Lei ida tama iha vigor tenke implementa husi ministériu ne'ebé administra setor ne'e nian.

Prespetiva estratéjika kona-bá política defeza nasional, iha exersísiu formulasaun política defeza Estadu ida nian, ameasa no interese estratéjiku maka determina estrutura forsa defeza nian. Tamba ne'e, implementasaun ba planu sira nune'e, presiza ho estudu ka refleksaun ruma hanesan temi iha programa Governu nian. Hanesan mos Planu Força 2020 (Estudu Força 2020) ho ambisaun ne'ebé a'as maibe la realistiku no kontestual, ikus mai dokumentu mahar ida ne'e la konsege implementa. Tamba la iha kbiit orsamentu hodi realiza mehi a'as ne'ebé hatuur iha dokumentu ne'e. Ho nune'e, diak liu Governu fó prioridade ba revizaun Planu Força 2020 hodi estabeselese postura forsa defeza ida ne'ebé realistiku no kontestual.

Segundu, *Seguransa Interna – Polísia Komunitária*, relatóriu Avaliasaun Oficial Polísia Suku (OPS) tinan 2018 hatudu polisiamentu komunitária hetan progresu no tulun ona comunidade sira. Iha avaliasaun ne'e rekomenda ba Komandu Jeral PNTL no Ministériu Interior continua mellora servisu OPS (polisiamentu komunitária) nian. Maske nune'e, polisiamentu komunitária sei sai difikuldade liu tan no hanesan *slogan* deit bainhira Lei Orgânica foun PNTL nian pasa. Tamba esbosu Lei ne'ebé Komandu Jeral PNTL no Ministériu Interior prepara *copy-paste* deit husi Lei Orgânica Guarda Nacional Republicana (GNR) nian ne'ebé nia natureza militar.

Terseiru, *Investigasaun Sientifika no Kilat*, PSIK hanesan orgaun polísia kriminal ne'ebé halo investigasaun ba krime grave, organizada ka komplekasu sira. Nune'e prezensa PSIK nian atu fó tulun ba autoridade judisiál sira, investigasaun no asegura sentralizasaun nasional ba informasaun kriminal. Nomos fó tulun ba autoridade judisiál sira iha prosesu sira ne'ebé iha relasaun ho krime sira ne'ebé delega ba nia atu halo investigasaun ka bainhira husu ba nia atu foti medida sira ne'ebé iha molok julgamentu no rekere kuiñesimentu ka meu tékniku espesiál sira.

Maske nune'e, Diploma Ministerial N.º 33/2017 de 24 de Maio aprova ona tipu no kalibre armas fogu ba pessoal Polícia Científica de Investigação Criminal (PSIK). Diploma Ministerial ne'e define tipu kalibre arma fogu ne'ebé pessoal PSIK iha direitu atu uza ho tipu pistola kalibre 9X19 mm no prosesu sosa kilat ba PSIK Governu liu husi Ministériu Justisa finaliza ona. Maibe haree ba realidade ne'ebé Timor-Leste liu ona, la nesesariu sosa kilat ba PSIK no importante liu investe iha sira nia kuiñesimentu no ho apoiu ekipamentu sira ne'ebé modernu tuir padraun sira sientífika nian. Tamba investe ba kilat bele aumenta mos problema bainhira la kontrola ho diak. Kazu Kulu-Hun – Dili iha tinan 2018 konfirma preokupasaun sira nune'e.

### **Rekomendasaun**

1. Governu liu husi Ministru Defeza fó prioridade ba revizaun ba Planu Força 2020 hodi estabese postura forsa defeza ida ne'ebé realistiku no kontestual. Duke Servisu Militar Obrigatoriu ne'ebé halo baralla deit setor defeza nian no hatodan mos despeza Estadu nian.
2. FM rekomenda ba Ministériu Interior no Komandu Jeral PNTL haree fila-fali esbosu Dekretu-Lei Orgânica PNTL nian no dezenvolve tuir natureza polisiamentu PNTL "polísia komunitária" ne'ebé durante ne'e halo no PNTL nia servisu sai vizivel no hetan konfiansa maka'as husi comunidade.
3. Rekomenda ba Ministériu Justisa halo revizaun ba Orgânica PSIK nian hodi hatuur PSIK nia mandatu tuir lolos nia misaun iha âmbito investigasaun ida sientífika. Nomos Komisaun A no Komisaun B Parlamentu Nasional bolu Ministru Jusitisa justifika kona-bá razaun sira hola kilat ba PSIK hodi hatan ba polémika ne'ebé daudaun ne'e espalla iha públiku.

Atu hetan informasaun kle'an liu kona-bá asuntu ne'e bele kontaktu:

#### **João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemovel: (+670) 7756 1184

Website: [www.fundasaunmahein.org](http://www.fundasaunmahein.org)